






# EXAMEN D'EMPROVA 1

<b>Num:</b> _____	<b>Data:</b> _____
<b>70 – 60 puncts: fitg bun</b> _____	<b>Puncts cuntanschids:</b>
<b>59 – 45 puncts: bun</b> _____	• chapientscha dal text: 
<b>44 – 30 puncts: suffizient</b> _____	• stgazi da plects: 
<b>sut 30 puncts: betg suffizient</b> _____	• producziun da text: 
	• grammatica: 
	<b>puncts totals:</b> 

## A) Chapientscha dal text

Legia attentamain il text e respunda sunter uschè exact sco pussaivel a las dumondas! Per mintga punct stos ti chattar e nudar in argument!

Attenziun: formular las respostas en **frاسas entiras!**

### «Amur e dolor van gugent ensemen»

Co s'expressivan ils inamurads pli baud?

da Claudia Cadruvi (artitgel en La Quotidiana dals 9-8-2011)

1 **Per schabetg è Silvana Derungs dada sin la tematica – charezza ed amur e sias**  
2 **expressiuns. La giuvna romanista ha cumenzà a fufagnar ed ha chattà raritads**  
3 **preziusas ed intginas vulgaritads dal stgazi da plects da pli baud.**

4  
5 Dapi varga in onn lavura Derungs tar il Dicziunari Rumantsch Grischun (DRG) a Cuira.  
6 Per sa famigliarisar cun sia incumbensa ha ella l'emprim tranter auter gidà a far excerpts,  
7 pia tschertgar expressiuns u modas da dir che n'èn anc betg registradas en las nundumbraivlas  
8 stgatlats ed en las datotecas dal DRG. Tals excerpts fan ins cun cudeschs novs u cun gasettas.  
9 Derungs ha prendì sut la marella il Tschespet «Dunnas». En lez è ella stgarpitschada sur il pled  
10 «ovulaziun». Cura ch'ella ha endatà il pled, n'existiva anc nagin chavazzin per «ovulaziun» en la  
11 datoteca. Quai ha sveglià las mirveglias da la giuvna assistenta scientifica. Tranteren, sch'ella  
12 haja temp, ha ella perquai sfuignà en ils toms dal DRG ed en las milli stgatlats che cuntregnan ils  
13 plects rimnads.

14  
15 **Erecziun e vagina n'existan betg**

16 L'emprim ha ella tschertgà plects dal corp e da la sexualitad, per exempel «erecziun».

17 Il tom cun il bustab «e» dal 1972 enconuscha mo «l'erecziun d'ün ospidel circuitel vi Samedan»  
18 u la «erecziun d'ina casa per disturbai dil spert» en Surselva. Era sut il chavazzin «Scheide»  
19 ha Derungs chattà mo set cedels en las stgatlàs: intgins cedels sa refereschon sin la nadira  
20 da vatgas, auters sin la taja per la spada ed in cedel cuntegna la circumscripziun pauc erotica  
21 «canal da comunicaziun». Tge eri cun ils Rumantschs da pli baud? Eran els mituns?  
22 U levan els simplamain mo far l'amur e s'empipavan da baterlims? Avant tschient onns cura  
23 ch'ils pioniers dal DRG – Robert de Planta, Florian Melcher e Chasper Pult – han tramess ils  
24 questionaris en las regiuns rumantschas, avevan els vulì savair mintga detagl dal corp uman.  
25 «Ma ins po dir ch'els han chalà sut l'umbli e pir fatg vinavant tar las coissas», di Derungs.  
26 Perquai posseda il DRG en il questionari da Planta 16 chavazzins mo gia per il nas e sias parts,  
27 inclus pelegna dal nas e mutschnegra, las genitalias dad um e dunna però n'han ils  
28 perscrutaders da la lingua a sias uras betg ristgà d'examinar. Derungs ha tschertgà en autras  
29 funtaunas, tge plets ch'ins duvrava per l'amur e la sexualitad. Ella ha chattà material en la  
30 Crestomazia, en l'Atlas etnologic svizzer u en las Annalas. Ina schelta da sia racolta ha la  
31 collavuratura preschentà en il referat «Amur e dolor - Lieb und Leid» ch'ella ha tegnì avant in  
32 mais a Cuir. En il referat è Derungs suandada pass per pass ils fastizs dal s'inamurar: l'emprim  
33 flirtar, lura bitschar, lura datti forsa in chanaster, etc.

34

### 35 **Tschegnar e survegnir la pala**

36 Tgi che vul ina marusa cumenza cun «flirtar» per duvrar l'expressiun d'ozendi.

37

38 Oz sco pli baud levan ins cun «flirtar» carmalar l'attenziun da la matta desiderada.  
39 «Far tottas tgosas» numnavan ils Surmirans questa activitad. Ils Sursilvans schevan  
40 «tschaghignar», «far bibi» u «tschittas da mats». A Sent aveva quai num «far gnecca». E sch'il  
41 giuven e la giuvna s'avischinavan in a l'auter e sa charsinavan avevi num «star a gnecca».  
42 Ma atenziun! En Surselva era «far gneg» ina expressiun vulgara e pauc romantica, fa Derungs  
43 attent. I vuleva dir il medem sco oz «ficcar». Sche flirts, flattims e compliments na faschevan  
44 nagin effect devi in chanaster. Sche la refusa aveva dad esser in pau pli recenta per ch'il giuven  
45 chapeschia il messadi, pudeva la matta era «dar in schierl» u «dar la pala». La giuvna scheva lura  
46 forsa a sia amia ch'ella na veglia quest giuven «gnanca per ün jat in stalla», «ni ancha per  
47 sdratsch avant esch» u en il mender cas «niencha pittüro». Suentar in tal tractament e las  
48 nauschas blastemmas pativa il pauper giuven sa chapescha. Il mal d'amur era per el sco da  
49 «perder las plemas». In auter endirava forsa anc pli fitg e sa sentiva sco in utschè ch'ins ha «tratg  
50 ora las alas». Per ina giuvna rufidada d'in marus eri sco sch'ins avess «taglià jò la tarscholla»,  
51 «la marüschia» u gist l'entir «tschü».

52

### 53 **«Baubau da femnas»**

54 Ma i dat – e deva – adina giuven che na perdan betg uschè svelto il curaschi, pertge els èn  
55 inamurads sco «ün giat», «ün jal», «scu'n nar», «sc'ina rascha». Era giuvenas s'inamuran mintgatant  
56 «sco üna giatta» u «sco'na chogna». I po perfin capitar ch'insatgi «s'incarogna» ch'el sa  
57 desparscha da spir passiu. Per cletg piglia l'amur savens anc ina buna fin. Lura di la glied, el  
58 ha «fatg si in'amitga», el «as metta aint con üna» u el ha «drizà marusa». El ha «fitgà cadeina»  
59 tuna main encuraschant. Ina gronda schelta d'expressiuns ha Derungs chattà per quels umens e  
60 dunnas che han gugent variaziun e fan l'amur cun differentas persunas. Ils umens survegnan en  
61 quest cas il titel sco «boc da cumün» (Scuol), «baubau da femnas» (Scharans), «gialadeccal»  
62 (Val Müstair) u «letgatureras». A las dunnas din ins «tgigisch», «chaval da somma», «sguragiunza»,  
63 «caura da cumin» (Trun), «pastira da Camuns» (Lumbrein). Las expressiuns possedan tuttas in tif  
64 negativ, sulet «haver in cor sco in caz furau» intuna dapli chapientscha u simpatia.

65

### 66 **Variantas da bitschar**

67 En il referat «Amur e dolor» ha Derungs explitgà usits sco il «ir a mattauns» u las reglas da «sairas  
68 da saut». Era las cumpagnias da mats enconuschevan directivas co che giuven e giuvenas avevan  
69 da sa depurtar sch'els levan vegnir ensemen. Or da sias retschertgas prenda Derungs uss in u

70 l'auter pled ch'ella less duvrar en l'avegnir en ses vocabulari activ. Il «gnec» saja in da quests  
71 plets, di Derungs. E forsa chatta in u l'auter lectur en la schelta da las expressiuns per «bütsch» u  
72 per «buna» ina variaziun inspiranta per il stgazi da plets da las atgnas amuraivladads. Ins pudess  
73 gea ina giada dar in «bunin», ina «betscha», in «bip», ina «bippa», ina «bunschina» u sco ils da  
74 Domat – cun brav temperament e ch'ins auda lunsch enturn – in hazer «lop»?

1. Nua va Silvana Derungs a la tschertga da las expressiuns per charezza ed amur, per il corp e la sexualitad?

---

---

---

1 p	
-----	--

2. Tge sis attributs van a prà cun Silvana Derungs? Noda els!

---

---

---

3 p	
-----	--

3. Tge manegia Silvana Derungs cun: «Ma ins po dir ch'els han chalà sut l'umbli e pir fatg vinavant tar las coissas»?

---

---

---

2 p	
-----	--

4. Tge è manegià en il text cun «il canal da communicaziun»?

---

---

1 p	
-----	--

5. Fa in exempel concret per «survegnir in chanaster»!

---

---

---

1 p	
-----	--

6. Numna in'expressiun ch'ins duvrava,

a) sch'ina giuvna vegniva rufidada d'in marus.

---

b) sche l'amur pigliava ina buna fin.

---

2 p	
-----	--

7. Tge vul quai dir, sch'ina giuvna ha in cor sco in chaz furà?

---

---

---

2 p	
-----	--

8. Il titel da l'artitgel è «Amur e dolor van gugent ensemen». Pertge?

---

---

---

2 p	
-----	--

9. Èn questas frastas gistas u faussas tenor il text? Fa ina crusch!

	<b>gist</b>	<b>fauss</b>
Il DRG (Dicziunari Rumantsch Grischun) rimna plects en rumantsch grischun.		
Il plect «erecziun» exista en il tom cun il bustab «e».		
Ils Rumantschs na possedan betg blers plects per las genitalias da l'um e da la dunna.		
Pli baud na vegnivi betg fatg l'amur, perquai n'enconuschevan ins era betg plects persuerter.		
«Lop» è in auter plect per in ami.		
Avant tschient onns han ils pioniers dal DRG tramess questunaris en las regiuns rumantschas.		

6 p	
-----	--

## B) Stgazi da plets

### 1. Sinonims

a) Inditgescha mintgamai in sinonim (pled da la medema spezia/medema significaziun) per ils suandants plets! (exempel: magher – falomber)

l'incumbensa (6)	
il schabetg (1)	
la retschertga (69)	
examinar (28)	
ils baterlims (22)	

2.5 p

b) Tge pled na va betg a prà cun il auters? Fa ina cruschi!

<input type="checkbox"/> attractiv	<input type="checkbox"/> erotic	<input type="checkbox"/> grazius	<input type="checkbox"/> sexy
<input type="checkbox"/> ir suenter	<input type="checkbox"/> empipar	<input type="checkbox"/> suandar	<input type="checkbox"/> perseguitar
<input type="checkbox"/> simpel	<input type="checkbox"/> cler	<input type="checkbox"/> facil	<input type="checkbox"/> fatal
<input type="checkbox"/> negativ	<input type="checkbox"/> affirmativ	<input type="checkbox"/> disfavuraivel	<input type="checkbox"/> dischavantagius
<input type="checkbox"/> la sancziun	<input type="checkbox"/> la consequenza	<input type="checkbox"/> l'effect	<input type="checkbox"/> la guariziun
<input type="checkbox"/> carmalar	<input type="checkbox"/> attrair	<input type="checkbox"/> embellir	<input type="checkbox"/> trair natiers
<input type="checkbox"/> bitschar	<input type="checkbox"/> dar in baubau	<input type="checkbox"/> dar ina buna	<input type="checkbox"/> dar bitschs

2.5 p

### 2. Antonims

Inditgescha mintgamai in antonim (pled da la medema spezia/significaziun cuntraria) per ils suandants plets! (exempel: grond – pitschen; betg lubì: grond – betg grond)

l'amur (1)	
dir (7)	
giuven (41)	
rimnar (13)	
il curaschi (54)	

2.5 p

### 3. Declerar plets

Declera cun frastas entiras e correctas las suandantas expressiuns che cumparan en il text! Ti na dastgas betg duvra l'expressiun senza en tia explicaziun!

la mirvegla (11)	
la datoteca (8)	
exister (10)	
retschertgar (69)	
l'avegnir (70)	

2.5 p

### C) Produenziun da text

In enconuschent citat pertutgant amur e dolur è

### **«Nattas sin il corp èn segns ch'ins ha vivì. Nattas sin l'olma èn segns ch'ins ha amà!»**

*(atur nunenconuschent; nattas = Narben)*

Tge pensas ti dal citat? Constat el tenor tes manegiar? Descriva ina u pliras situaziuns che illustreschan tias explicaziuns!

Scriva in text dad almain 150 plets! Scriva frასas bain formuladas ed emprova da variar il stgazi da plets! Structurescha bain il text ed al dà in titel interessant!

Titel: \_\_\_\_\_

---

---

---

---

---

---

---

---

---

---

---

---

---

---

---

---

---

---

---

---

---

---

---

---



## D) Grammatica

### 1. Furmas dal verb

Cumplettescha la tabella cun las furmas che mancan!

Infinitiv	1. sg. present	1. pl. present	3. pl. feminin perfect	cundizional	conjunctiv I
<b>esser</b>	jau sun	nus	ellas	jau	che jau
<b>vesair</b>	jau	nus vesain	ellas	ti	che ti
<b>dar</b>	jau	nus	ellas han dà	el	ch'ella
<b>vegnir</b>	jau vegn	nus	ellas	vus	che vus
<b>descriver</b>	jau	nus	ellas	ellas	ch'ellas descrivian

5 p

### 2. Transfurmar plets

Transfurmescha ils plets en la spezia da plets inditgada!

*Exempel: dissegnar (nomen) - il dissegn*

1. la lavur (verb)	
2. l'inspiraziun (adjectiv)	
3. eleger (nomen)	
4. exister (nomen)	
5. il pled (verb)	
6. la directiva (verb)	
7. las mirveglias (adjectiv)	
8. activ (nomen)	
9. l'amur (verb)	
10. posseder (nomen)	

5 p

### 3. Sintaxa

Ti chattas qua «salatas da plets». Sche ti mettas ils singuls plets en la dretga successiun, datti ina frasa correcta. Vi dal segn d'interpunziun a la fin da la salata da plets vesas ti, sch'i sa tracta d'ina dumonda, d'ina exclamaziun u d'ina frasa «normala». Ti na dastgas ni midar ils plets, ni laschar davent ni agiuntar insatge.

*Exempel: adina pes mai a stas enta ti! - Ti stas adina enta pes a mai!*

a) turnà signur gist da è la Simeon lavur.

---

b) ha nauscha fitg el luna.

---

c) e in telefonà al ha client ditg lung.

---

d) chaussa d'ina els discurri han difficila.

---

e) a sto ses el explitgar cas quest schef?

---

f) da temp perquai la nagin n'ha el leger gasetta.

---

g) Simeon ha tanta adina signur lavur?

---

h) questa a baud vul saira ir pli el letg.

---

i) va letg suenter el adina a mesanotg.

---

j) nagin tegna quai na ora.

---

#### 4. Curreger sbagls

Mintga frasa sutvart cuntegna in sbagli. Suttastritga il sbagli e scriva la furma correcta en la tabella!

**Atenziun! Per tut ils plects corrects che ti curregias perdas ti puncts!**

1. Meis bab ha cumprà in auto nov.
2. Els baivan vin dalla Frantscha dal Sid.
3. Sainza spetgar sia resposta cuntinuescha ella cun ses predi.
4. La duna senta ch'ella vegn tut cotschna.
5. Ella regiun Sargans èn morts 3 persunas.
6. El è curri fitg spert.
7. Ella ha betg gugent glatsch.
8. Jau vul comprar in Audi.
9. Quist cudesch è fitg bel.
10. Il mat raquintà sia istorgia a l'umet.

1. correctura	
2. correctura	
3. correctura	
4. correctura	
5. correctura	
6. correctura	
7. correctura	
8. correctura	
9. correctura	
10. correctura	

10 p

# EXAMEN D'EMPROVA 1: SOLUZIUNS

## A) Chapientscha dal text

1.

- Silvana Derungs è ida a la tschertga da las expressiuns en nundumbraivlas stgatlas ed en las datotecas dal DRG (Dicziunari Rumantsch Grischun).
- Ella ha chattà material en la Crestomazia, en l'Atlas etnologic svizzer u en las Annalas.

*(Per la risposta corretta datti in punct, totalmain datti in punct.)*

2.

- Silvana è in tip mirveglius, ha gugent il rumantsch, è averta, metta gugent il det sin la plaja, n'ha nagin turpetg fallà, è assistenta scientifica, stat gugent davant la gliעד, tip engaschè ed iniziativ, ella è giuvna.

*(Per mintga attribut correct datti in mez punct, totalmain datti trais puncts.)*

3.

- Tut ils plets che han da far cun las genitalias da l'um e da la dunna n'èn betg da chattar en las datotecas/stgatlas dal DRG.
- Avant tschient onns cura ch'ils pioniers dal DRG – Robert de Planta, Florian Melcher e Chasper Pult – han tramess ils questunaris en las regions rumantschas, avevan els vulì savair mintga detagl dal corp uman. Las genitalias da l'um e da la dunna n'han ils perscrutaders da la lingua a sias uras però betg ristgà d'examinar.

*(Per ina risposta correcta datti in punct, totalmain datti dus puncts.)*

4.

- Il «canal da comunicaziun» è in auter pled per la vagina.

*(Per la risposta correcta datti in punct, totalmain datti in punct.)*

5.

- In um dumonda ina dunna da passentar ina saira in cun l'auter. La dunna na vul betg far quai/n'ha betg veglia ed ella al di da na. Uschia ha l'um survegni in chanaster.

*(Per in exempel correct datti in punct, totalmain datti in punct.)*

6.

- Per ina giuvna rufidada d'in marus eri sco sch'ins avess «taglià jò la tarscholla», «la marüschna» u gist l'entir «tschü».
- Sche l'amur pigliava ina buna fin, scheva la gliעד p.ex. «el ha fatg si in'amitga».

*(Per ina risposta correcta datti in punct, totalmain datti dus puncts.)*

7.

- Ins di che las dunnas che hajan in «cor sco in chaz furà» hajan gugent variaziun e fetschian l'amur cun differentas persunas.
- Las dunnas na pon betg sa decider mo per in um e prendan perquai plirs.
- Il cor ha rusnas e vegn uschia mai plain, perquai ha el plaz per blers marus.
- Il cor na po betg tegnair mo in'amur, ellas crodan/culan or dal cor.

*(Per ina risposta correcta datti dus puncts.)*

8.

- La persuna ch'ins ama il pli fitg po era far mal ad ins il pli fitg. Ins avra il cor ed uschia pon entrar ils buns, ma er ils nauschs sentiments.
- Quels ch'èn ina giada vegnids trumpads da l'amur sentan quant profundas che las blessuras èn. Ina gronda dolor e tristezza restan enavos.
- Mintga amur che na funcziuna betg lascha enavos in sentiment da dolor.

*(Per mintga risposta correcta datti dus puncts.)*

9.

	<b>gist</b>	<b>fauss</b>
Il DRG (Dicziunari Rumantsch Grischun) rimna plets en rumantsch grischun.		x
Il pled «erecziun» exista en il tom cun il bustab «e».	x	
Ils Rumantschs na possedan betg blers plets per las genitalias da l'um e da la dunna.	x	
Pli baud na vegnivi betg fatg l'amur, perquai n'enconuschevan ins era betg plets persunter.		x
«Lop» è in auter pled per in ami.		x
Avant tschient onns han ils pioniers dal DRG tramess questiuinaris en las regiuns rumantschas.	x	

*(Mintga risposta correcta dat in punct, totalmain datti sis puncts.)*

## B) Stgazi da plects

### 1. Sinonims

a)

l'incumbensa	l'incarica, il pensum, la lezia
il schabetg	l'eveniment, il cas
la retschertga	la perscrutaziun, il studi, l'exploraziun
examinar	retschertgar, intercurir, controllar
ils baterlims	las tschantschas, il palaver, il baterliez, las tschantscharias, las fafanoias, il talachim, las bagliaffarias, il bagliaffim, la bahautscha

(Mintga risposta correcta dat in mez punct, totalmain datti dus puncts e mez.)

b)

<input type="checkbox"/> attractiv	<input type="checkbox"/> erotic	<input checked="" type="checkbox"/> grazius	<input type="checkbox"/> sexy
<input type="checkbox"/> ir suentar	<input checked="" type="checkbox"/> empipar	<input type="checkbox"/> suandar	<input type="checkbox"/> perseguitar
<input type="checkbox"/> simpel	<input type="checkbox"/> cler	<input type="checkbox"/> facil	<input checked="" type="checkbox"/> fatal
<input type="checkbox"/> negativ	<input checked="" type="checkbox"/> affirmativ	<input type="checkbox"/> disfavuraivel	<input type="checkbox"/> dischavantagius
<input type="checkbox"/> la sancziun	<input type="checkbox"/> la consequenza	<input type="checkbox"/> l'effect	<input checked="" type="checkbox"/> la guariziun
<input type="checkbox"/> carmalar	<input type="checkbox"/> attrair	<input checked="" type="checkbox"/> embellir	<input type="checkbox"/> trair natiers
<input type="checkbox"/> bitschar	<input checked="" type="checkbox"/> dar in baubau	<input type="checkbox"/> dar ina buna	<input type="checkbox"/> dar bitschs

(Mintga risposta correcta dat in mez punct, totalmain datti dus puncts e mez.)

### 2. Antonims

l'amur	l'odi, l'avarsiun
dir	taschair, betg dir pled
giuven	vegl, attempà, vegliurd, antic
rimnar	sfarlattar, spender, distribuir, dar or(a), reparter
il curaschi	la tema, il starment, l'anguscha, la sgarschur, il snuizi, il decuraschament

(Mintga risposta correcta dat in mez punct, totalmain datti dus puncts e mez.)

### 3.3. Declerar plects

Soluziuns pussaivlas:

la mirvegla	Avair il grond giavisch da vegnir a savair insatge privat, intim u zuppà dad in'otra persuna.
la datoteca	Ina rimnada p.ex. da fegls digitalis ch'èn categorisads tenor ina regla.
exister	Ina chaussa/persuna/animal ch'è qua, che viva, ch'è real.
retschertgar	Ina persuna che vul chapir in fatg va a la tschertga dad infurmaziuns.
l'avegnir	Il temp che suonda a partir dad uss (= il futur).

(Mintga resposta correcta dat in mez punct, totalmain datti dus puncts e mez.)

### C) Produenziun da text

<b>cuntegn e chapibilitad</b>	- lingua clera e bain chapibla - fluss da la lingua - suandà las indicaziuns dal pensum - coerenza e logica interna	2 2 1 2	<b>7</b>
<b>varietad: stgazi da plects e structura da las frasis</b>	- stgazi da plects varià e differenzià - evitar germanissem ed anglicissem - frasis variadas (simplas e cumponidas)	2 1 2	<b>5</b>
<b>correctadad formala</b>	- correctadad fonematica - correctadad morfematica - correctadad sintagmatica		<b>3</b>
<b>TOTAL</b>			<b>15</b>

## D) Grammatica

### 1. Furma dal verb

Infinitiv	1. sg. present	1. pl. present	3. pl. feminin perfect	cundizional	conjunctiv I
<b>esser</b>	jau sun	nus essan	ellas èn stadas	jau fiss	che jau saja
<b>vesair</b>	jau ves	nus vesain	ellas han vis	ti vesessas	che ti vesias
<b>dar</b>	jau dun	nus dain	ellas han dà	el dess	ch'ella dettia
<b>vegnir</b>	jau vegn	nus vegnin	ellas èn vegnidas	vus vegnissas	che vus vegnias
<b>descriver</b>	jau descriv	nus descrivain	ellas han descrit	ellas descrivessan	ch'ellas descrivian

(Mintga furma correcta dat in quart punct, totalmain datti tschintg puncts.)

### 2. Transfurmar plects

1. la lavur (verb)	lavurar
2. l'inspiraziun (adjectiv)	inspirant
3. eleger (nomen)	l'elecziun
4. exister (nomen)	l'existenza
5. il pled (verb)	pledar
6. la directiva (verb)	diriger
7. las mirveglias (adjectiv)	mirveglius
8. activ (nomen)	l'activitad
9. l'amur (verb)	amar
10. posseder (nomen)	il possess

(Mintga resposta correcta dat in mez punct, totalmain datti tschintg puncts.)



### 3. Sintaxa

- a) Signur Simeon è gist turnà da la lavur.
- b) El ha fitg nauscha luna.
- c) In client al ha telefonà ditg e lung.
- d) Els han discurrì d'ina chaussa difficila.
- e) Sto el explitgar quest cas a ses schef?
- f) Perquai n'ha el nagin temp da leger la gasetta.
- g) Ha signur Simeon adina tanta lavur?
- h) Questa saira vul el ir pli baud a letg.
- i) El va adina a letg suenter mesanotg.
- j) Quai na tegna nagin ora.

*(Mintga frasa correcta dat in mez punct, totalmain datti tschintg puncts.)*

### 4. Curreger sbagls

- 1. Meis bab ha cumprà in auto nov.
- 2. Els baivan vin dalla Frantscha dal Sid.
- 3. Sainza spetgar sia resposta cuntinuescha ella cun ses predi.
- 4. La duna senta ch'ella vegn tut cotschna.
- 5. Ella regiun Sargans èn morts 3 persunas.
- 6. El è curri fitg spert.
- 7. Ella ha betg gugent glatsch.
- 8. Jau vul comprar in Audi.
- 9. Quist cudesch è fitg bel.
- 10. Il mat raquintà sia istorgia a l'umet.

1. correctura	mes
2. correctura	da la
3. correctura	Senza
4. correctura	dunna
5. correctura	mortas
6. correctura	curri
7. correctura	n'ha
8. correctura	vi
9. correctura	Quest
10. correctura	raquinta

*(Mintga frasa curregida a moda correcta dat in punct, totalmain datti diesch puncts. Sch'i vegn curregì in pled correct, vegn tratg giu mintgamai in mez punct.)*